

Sinar Harian
11/9/2018 m/s 37

35 nelayan asing gagal kaut hasil laut

KEMAMAN - Cubaan 35 nelayan Vietnam yang menaiki tiga bot untuk mengaut hasil laut negara secara haram gagal apabila ditahan Agensi Penguatkuasaan Maritim Malaysia (Maritim) ketika sedang leka menangkap ikan.

Ketua Zon Maritim Kemaman, Komander Maritim Mohamad Rezal Kamal Bashah berkata, ketiga-tiga bot itu ditahan kapal ronda Maritim yang sedang menjalankan rondaan Op Makmur, Op Perkasa Timur dan Op Marikh di perairan Pahang, Terengganu dan Kelantan di Zon Ekonomi Eksklusif (ZEE) Malaysia.

Menurutnya, semasa kapal sedang melakukan rondaan di perairan Terengganu mereka mengesan tiga bot sedang menangkap ikan dalam keadaan mencurigakan.

Katanya, ketiga-tiga bot itu ditahan antara jam 12 hingga 1.45 tengah hari kelmarin pada jarak lingkungan 140 hingga 145 batu nautika dari Kuala Kemaman.

"Hasil pemeriksaan kita



Tiga-tiga bot yang ditahan tiba di Jeti Pangkalan Maritim Kemaman petang semalam.

dapati tiga bot itu dinaiki tiga tekong dan 32 awak-awak yang berusia antara 19 hingga 58 tahun.

"Tekong bot juga gagal mengemukakan sebarang dokumen atau permit yang sah dari Jabatan Perikanan untuk menangkap ikan. Tekong dan awak-awak juga tidak memiliki dokumen pengenalan diri," katanya pada sidang media di Pangkalan Maritim Kemaman sejurus ketiga-tiga bot itu tiba di jeti

pangkalan itu semalam.

Mohamad Rezal berkata, pemeriksaan lanjut mendapati ketiga-tiga bot berkenaan mengandungi hasil tangkapan ikan segar sebanyak 600 kilogram.

"Selain itu kita turut temui 3,000 liter diesel. Minyak yang banyak ini dipercayai untuk menampung penggunaan bahan api bot-bot itu di tengah laut untuk tempoh yang lama," katanya.



Mohamad Rezal (kanan) menunjukkan ikan dirampas dari tiga bot nelayan asing yang ditahan.

Beliau berkata, nilai rampasan ketiga-tiga bot tersebut bersama peralatannya dianggarkan bernilai RM3 juta.

Menurutnya, kesemua nelayan warga asing terbabit ditahan di bawah Akta Perikanan 1985 dan Akta Imigresen 1959/63.

"Jika sabit kesalahan bot-bot terbabit boleh dirampas dan tekong boleh didenda sehingga RM1 juta dan awak-awak boleh didenda

RM500,00 seorang," katanya.

Mohamad Rezal berkata, operasi dilakukan pihaknya bagi mencegah dan menyekat pencerobohan bot nelayan asing yang semakin berani memasuki dan menangkap ikan di perairan negara ini.

"Maritim akan terus komited memperkukuhkan kedaulatan perairan negara dengan mempergiatkan lagi rondaan," katanya.